

Budi bicara hakim hukum pesalah dadah

→ ISU

Budi bicara hakim hukum pesalah dadah

→ Kabinet setuju pindaan Seksyen 39B Akta Dadah Berbahaya 1952

Oleh Syed Azwan Syed Ali
syedazwan@bh.com.my

► Kuala Lumpur

Keputusan Kabinet bersetuju meminda Seksyen 39B Akta Dadah Berbahaya (ADB) 1952 untuk memberi kuasa budi bicara kepada hakim menentukan hukuman ke atas pengedar dadah dilihat sebagai langkah pertama dalam usaha memansuhkan hukuman mati mandatori di negara ini.

Ia selaras dengan standard sistem keadilan antarabangsa di mana hukuman mati mandatori tidak lagi diamalkan di kebanyakan negara maju.

Difahamkan, ketika ini 25 negara masih mengamalkan hukuman mati mandatori, termasuk Bangladesh, India, China dan Singapura.

Bendahari Persatuan Promosi Hak Asasi (PROHAM) yang juga bekas Pesuruhjaya SUHAKAM, Muhammad Sha'ani Abdullah, berkata keputusan itu membolehkan hakim menggunakan kuasa budi bicara dalam menentukan hukuman ke atas pengedar dadah.

"Ini langkah pertama ke arah pemansuhan hukuman mati, sekarang kena fikir langkah moratorium (penangguhan) seperti hukuman penjara seumur hidup sebagai ganti.

"Ia juga sejajar dengan standard

hak asasi manusia," katanya ketika dihubungi BH di sini semalam.

Muhammad Sha'ani mengulas kenyataan Menteri di Jabatan Perdana Menteri, Datuk Seri Azalina Othman Said bahawa Kabinet sebulat suara bersetuju memberikan hakim kuasa budi bicara dalam menentukan hukuman ke atas pengedar dadah berbanding hukuman mati mandatori dengan meminda Seksyen 39B ADB 1952.

Langkah ke depan

Menjawab soalan di Parlimen, Azalina berkata agensi dan kementerian berkaitan akan menyediakan memorandum kepada Kabinet untuk kelulusan berhubung perkara itu.

Sementara itu, Naib Pengerusi Kanan Yayasan Pencegahan Jenayah Malaysia (MCPF), Tan Sri Lee Lam Thye menyifatkan keputusan itu sebagai langkah ke depan dalam sistem kehakiman negara.

Katanya, ketika ini, hakim tiada pilihan lain selain mengenakan hukuman mati mandatori jika sabit kesalahan mengikut Seksyen 39B ADB.

"Ini bukannya menghapuskan hukuman gantung tetapi memberi kuasa budi bicara kepada hakim untuk menentukan hukuman sesuai di mahkamah," katanya menjelaskan pindaan itu pernah dibangkitkan beliau sejak dua tahun lalu selari dengan peredaran zaman.



Ini langkah pertama ke arah pemansuhan hukuman mati, sekarang kena fikir langkah moratorium (penangguhan) seperti hukuman penjara seumur hidup sebagai ganti"

Muhammad Sha'ani Abdullah,
Bendahari Persatuan Promosi Hak Asasi (PROHAM)



Ini bukannya menghapuskan hukuman gantung tetapi memberi kuasa budi bicara kepada hakim untuk menentukan hukuman sesuai di mahkamah"

Lee Lam Thye,
Naib Pengerusi Kanan Yayasan Pencegahan Jenayah Malaysia (MCPF)

Info

Hukuman terhadap pengedar dadah

- 39B Akta Dadah Berbahaya 1952, memperuntukkan hukuman mati mandatori bagi kesalahannya;
- **Mengedar ganja** melebihi 200 gram
- **Mengedar candu** melebihi 1000 gram
- **Mengedar heroin / morfin / dan Monoacetyl Morphine** melebihi 15 gram
- **Mengedar syabu** melebihi 50 gram